



Sámekonferánsa Roavvenjárgga 2008 - cealkámuš

Cealkámuš Davviriikalaš sámekonvenšuvnna evttohusas

Sámiid 19. konfereansa, čoahkkanan Roavvenjárgii, Suomas golggotmánu 29-31.beivviid 2008, atná buorrin Davviriikalaš sámekonvenšuvnna evttohusa, man ovttajienalaš áššedovdijoavku ovdanbuvttii golggotmánus 2005. Áššedovdijoavkkus ledje ovddasteaddjit ráđđehusain ja Suoma, Norgga ja Ruođa sámedikkiin. Konfereansa lea giitevaš áššedovdijovkui go leat buktán konvenšuvdnačállaga mii lea dassái, konsekveanta ja čuovvu riikkaidgaskasaš rievtti, nu mo bohtá ovdán ee. easka dohkkehuvvon ON julggáštusas álgoálbmogiid rivttiid birra.

Sámekonfereansa atná earenomáš dehálažžan dan guokte vuodđoášši mat leat Sámekonvenšuvnna vuodđun;

- 1) dohkkehit sápmelaččaid vuodđorievtti álgoálbmogin ja eamiássin min árbevirolaš guovlluin, ja
- 2) buoremus lágiin geahpedit daid vahágiid mat bohtet das ahte árbevirolaš sámi guovllut leat juhkkuojuvvon riikarájiguin njealji riikii.

Sámekonvenšuvdna bidjá vuolemusstandárddaid maid stáhtat fertetit dohkkehit jus sámi álbmot galggaš beassat seailuhit ja ovddidit sin oktasaš gullevašvuoda álbmogin, maiddái riikkaidgaskasaččat. Sámekonvenšuvnna ratifiserema bokte stáhtat olláshuhttet sin lohpadusa dahkat vejolažžan sápmelaččaide seailuhit ja ovddidit oktavuodaid ja ovttasbarggu riikkaidgaskasaččat, nu mot bohtá ovdán Artihkal 36'as ON deklarašuvnnas álgoálbmogiid rivttiid birra. Buot davviriikkat dorjo Álgoálbmotdeklarašuvnna ratifiserema, ja leat lohpidan árvvusatnit dan. Daid ákkaid geažil leat stáhtat geatnegahtton ratifiseret Sámekonvenšuvnna stajitkeahttá.

- **Sámekonfereansa vuorrástuvvá go Suopma, Norga ja Ruođta eai leat bastán maidege dahkat Sámekonvenšuvnna evttohussii, vaikko leat golbma jagi áigi go álmuhuvvui.**
- **Sámekonfereansa lea earenomážit vuorrástuvván go Suopma lea aitto cealkán ahte plánejit geassádit proseassas mas mihttu lea ratifiseret Sámekonvenšuvnna.**
- **Sámekonfereansa ávžžuha Suoma ain joatkit Sámekonvenšuvdnaproseassas, ja ahte dat golbma ráđđehusat ja Sámedikkiit dalán nammadit ráđđádallanjoavkku mii sáhtá heivehit jođánis ratifiserema Sámekonvenšuvnnas.**